

## **Pampango - Espiritual Mekilaban Kasulatan - SW Intro Scriptures**

**Lucas 17:5 Ngara ding apostol king Ginu, “Dagdagan mu ing kekaming kasalpantayanan!”**

**Roma 10:17 Inya daratang ing kasalpantayanan king kapamilatan na ning pamakiramdam king amanung mipanaral at ing amanung manibatan king pamanaral tungkul kang Cristo.**

**Lucas 11:1 Misan, manalangin ya i Jesus king metung a lugal. Inyang mayari ne, ngana ning metung a alagad, “Ginu, ituru yu kaming manalangin antimo ing depatan nang Juan karing alagad na.”**

**1 Timoteo 2:1-4 Maygit king sabla, ipakisabi kung mayap king ing kekayung kayaduanan, panalangin, pamanigapu, at pamipasalamat iyampang yu king Dios para karing sablang tau. 2 Makanyan munaman ing daptan yu para karing ari at karing ating upayang manibala ban mibiebie tamung tahimik at payapa, mataimtim at ating kabanalan. 3 Iti mayap at makaligaya king Dios a kekatamung Talapagligtas. 4 Buri na king miligtas la ding sablang tau at mabiasa la king katutuan.**

**Zacarias 3:1,2 Pepakit ne pa kanaku ning Ginu ing Pekapun da ring Paring i Josue a makatalakad arapan na ning anghel ning Ginu. Karin siping nang Josue makatalakad ya i Satanas; makasadia yang miyapag dalum laban kang Josue. 2 Ngana ning anghel ning Ginu kang Satanas, Parusan na ka sa ning Ginu, Satanas! Parusan na ka sa ning Ginung malugud king Jerusalem! Mengari ya ing taung yan king kapirasung dutung a mesagmit king api.**

**Efeso 6:12 Uling e la tau ding kalaban tamu nune espiritu lang pamuntuk; ila ding atyu king kayupayan at ding talapanibala na ning karalumduman a mag-ari king yatung iti; ding espiritung kawal ning dewakan king mabilug a yatu.**

**Efeso 6:10,11 Katataulian, magpaketata tag kayu king kapamilatan na ning pamakisanmetung yu king Ginu at king saup ning maragul nang kayupayan. 11 Isulud ye ing baluti a binie na ning Dios ban alabanan yu la ding sablang dewakan a pasari na ning diablo.**

**Efeso 6:13-17 Inya, isulud ye ing baluting ibat king Dios ban nung datang na itang aldo ning dewakan, asupil ye at kaybat na ning**

**kekayung pamakilaban, manatili kayu pa mu ring matatag. 14 Inya magsadia kayu: babatan ye ing kekayung awakan king sinturun na ning katutuan, itakap ye king salu yu ing baluti na ning katuliran. 15 At isulud anting sapatus karing bitis yu ing sipagan manaral king Mayap a Balita a babie kapayapan. 16 Idala yeng parati ing kasalpantayan anting kekayung kalasag; gamitan yeng anting paniagka at patmatda karing sablang milalablab nang paslu ning Marawak. 17 Isulud ye ing helmet a makaligtas, at gamitan yu ing amanu na ning Dios anting espadang binie ning Espiritu.**

**Hebreo 4:12 Uling ing amanu na ning Dios mabie ya at darapat ya. Maygit yang mataram kesa king nanumang espadang dobli taram. Managlus ya angga na king nung nu la mikakit ing kaladua at ing espiritu, angga na karing pisuglungan butul at utak da ring butul. Balu nang panuyatan pati na ing lihim nang buri at isipan ning tau.**

**Luke 4:8 Nganang mekibat Jesus, “Ing Kasulatan sasabian na, ‘Samban me ing Ginung kekang Dios at ya mung bukud mung suyuan.’ ”**

**Efeso 6:18 Daptan yu ing sablang iti king kapamilatan na ning panalangin at pamagamuamu king Dios. Manalangin kayu king sablang oras king patnube ning Espiritu. Inya parati kayung makasadia at manatiling manalangin para karing sablang pinili na ning Dios.**

**1 Samuel 17:45-47 Pekibat nang David king Filisteo, Lalapit ka kanaku a magdalang espada at tandus; oneng lalapit ku keka king lagyu na ning Ginung Mayupaya, ing Dios da ring sundalus ning Israel a kekang inamunan. 46 King aldong iti ibie na ka ning Ginu kanaku, at iragsa ra ka at tabtaban a batal. Kaybat pakan ku la ding bangke ra ding sundalus a Filisteo karing ayup at karing animal a mabangis. Makanyan dang abalu ding sablang tau king yatu king atin yang Dios ing Israel, 47 at ban abalu ra ding sablang makatipun keti king e ya magligtas ing Ginu king kapamilatan na ning espada at tandus. Manibat king Ginu ing tagumpe king labanan, at ipasambut na ka kekami.**

**Lucas 10:17-20 Migbalik lang masaya ding pitung pulu’t adua. Ngarang sinabi, “Ginu, memintu la kekami pati ding demonyu uli na ning lagyu mu!” 18 Nganang Jesus karela, “Ikit ke i Satanas a antimong kildap a menakbag ibat banua. 19 Makiramdam kayu! Dininan da kayung kayupayan damusak karing ubingan at alakdan at maygit**

**king upaya ning Kalaban at alang nanumang makapanasakit kekayu.  
20 Oneng e kayu magsaya ngening mamintu la kekayu ding  
marawak a espiritu, nune tumula kayu uling makasulat la ding lagyu  
yu karin banua.”**

**2 Corinto 10:3-5 Wa, tutu ing mabibie kami keti king yatu, oneng e ke  
makilaban ketang paralan na ning yatu. 4 Darala da ring kekaming  
sandata ing upaya na ning Dios a makapanyira karing kuta at e na la  
sandata ning yatu. Sisiran mi ing maling pamagmatulid, 5 at ing  
sablang pamagmaragul laban king Dios; bibihagan mi ing sablang  
kaisipan ban mamintu kang Cristo.**

**2 Timoteo 1:7 Buri da ing maging talaturu na la ning Kautusan kabang  
e ra naman aintindian ing karelang paniabian ni ding bage a tuturu  
da king mitmung tiwala.**

**Mateo 12:28,29 Ing kabud Espiritu na ning Dios ya ing babie upaya  
kanaku ban makapanabi ku karing demonyu at iti metung nang  
katunayan king ing Kayarian ning Dios dinatang ne kekayu. 29  
“Alang makapanlub king bale na ning taung masikan ban  
panakawanan ne king pibandian na. Kailangan igapus ne pa ing  
taung masikan. Nung agapus na ne, kanita ne pa malyaring  
panakawanan ing pibalebale na.**

**Efeso 1:13 At ikayu man, inyang dimdam yu ing balita na ning katutuan,  
ing Mayap a Balita a minie kaligtasan kekayu, meniwala kayu kang  
Cristo. Uli na niti, mibie ya kekayu ing tatak ning Banal a Espiritu  
antimong pinili na ning Dios!**

**Ding Dapat 19:6 Timpak na lang Pablo ding gamat na karela, at tinipa  
ya karela ing Banal a Espiritu; megumpisa lang migsalitang  
miyayaliwang amanu at penaral da naman ing amanu na ning Dios.**

**Marcos 16:15-18 At sinabi nang Jesus karela, “Munta kayu king  
mabilug a yatu at panaral ye ing Mayap a Balita karing sablang tau.  
16 Miligtas ya ing ninumang maniwala at pabinyag; oneng miparusan  
ya ing ninumang e maniwala. 17 Karetang maniwala, mayakit la  
deting mayupayang tanda: king lagyu ku makapalual lang demonyu;  
makapanabi lang aliwang amanu; 18 e la numanu balang agyang  
talnan da la ring ubingan o makainum lang lasun; itumpak da la ring  
gamat da karing masakit at deti kumayap la.”**

**1 Juan 1:9 Nung ikumpisal tamu ing kekatamung kasalanan, ayasahan  
tamu king ipatawad na la kekatamu ning Dios, at linisan na katamu**

**king sabla tamung kasalanan uling tapat ya.**

**Exodo 20:5 E kayu duruku karing idolo o sasamba kareti, uling aku, ing Ginung kekayung Dios, Dios kung mapangalalu. Parusan ku la detang masama kanaku, at pati na ding lahi ra angga na karing apu ra at apu king tud.**

**Dalit 109:17 Kapad na ing maniumpa, inya misumpa ya sa; e no buring mipala ding aliwa, inya e ya sa mipala.**

**Ukum 16:16 E ne tiknangan kukulitan aldo-aldo. Sinawa ya king kakakulit na,**

**Efeso 4:26 Nung sakaling mimua kayu, pangilagan yu ing e kayu mikasala at e yu paintulutan manatiling patingapun ing mua yu.**

**Roma 14:12 Inya king Dios ya munie kwenta ing balang metung at metung tungkul king sarili na.**

**1 Juan 2:23 Ing tatanggi king Anak tatanggian nia naman ing Ibpa. Ing ninumang tatanggap king Anak, tatanggapan nia naman ing Ibpa.**

**Juan 14:6 Pekibat nang Jesus, “Aku ing dalan, ing katutuan, at ing bie. Alang malyaring miras king Ibpa nung e mu king kapamilatan ku.**

**Mateo 11:28-30 “Lumapit kayu kanaku, ikayung sablang mapagal na at kababayatnan at dinan da kayung kapaynawan. 29 Pusanan ye ing paud ku at magaral kayu kanaku uling mamu ku at mababa lub, at manakit kayung kapaynawan. 30 Mayan yang idala ing paud ku at e mabayat ing papusan ku kekayu.”**

**2 Corinto 6:2 Uling ing Dios sasabian na, “Pekiramdamana da ka king oras a karapatdapat kaku, sinaupan da ka king aldo ning kaligtasan.” Makiramdam kayu! Ngeni na ing oras a karapatdapat. Ngeni na ing aldo ning kaligtasan!**

**Roma 10:13 Antimo ing sasabian na ning kasulatan, “Miligtas ya ing ninumang mamaus king lagyu na ning Ginu.”**

**Pastor T. John Franklin  
Church of Salvation, Healing, and Deliverance  
COS-HAD.org**